

本草述鉤元



本草述鉤元藥目

卷五下 石部

太一餘糧

禹餘糧 浮石

磁石

代赭石 石綠

石膽 即膽 礬 礞石

砒石

花乳石 石燕

蛇含石

卷六 鹵石部

食鹽

戎鹽 即青鹽

凝水石 即鹽精石亦名寒水石

元精石

朴消

芒消

馬牙消 風化消

元明粉

消石 即火消

生消

礪砂 蓬砂

石硫黃

礬石



卷七 山草部

甘草

甘草梢

甘草頭

黃芪

人參

參蘆

沙參

桔梗

薺芫

萎蕤

知母

肉蓯蓉

瑣陽

天麻

白朮

蒼朮

狗脊

巴戟天

遠志

淫羊藿



本草述鉤元卷五下 石部

武進楊時泰貞頤輯

太一餘糧

與禹餘糧同一種類生太山山谷者曰太一餘糧土氣之專

精也

生東海池澤者曰禹餘糧是得水氣之專精者

今惟會稽王屋澤潞諸山時有

之外裏若甲甲中有白白中有黃似雞子黃而重重如葉子

雌黃輕敲便碎如粉設其中無黃但有黃濁水是為石黃水

更有凝結如石者為石中黃非太一餘糧也

覈

氣味甘平 主治欬逆上氣癥瘕血閉漏下除邪氣肢節不

利久服耐寒暑不飢益脾安臟氣鎮五臟定六腑

諸本草

盧氏子由曰太一即太乙氣之始也塊然獨存而無所不存



故能鎮定中黃敦艮之止對待肺金不能收斂下降而致欬
逆上氣若癥瘕血閉者氣不响運也漏下淋漓者氣不收攝
也太一能令元氣屈曲而出使凝閉漏下者不得不隨之响
運抑揚所謂欲治其血先調其氣設元真萎頓則邪氣外薄
太一能暢真氣則邪氣自不相容矣肢體不利者氣壅之也
太一黃中通理宣氣四達氣拒而固不受寒暑氣充而實不
苦飢虛矣

修治 用黑豆黃精各五合水二斗煮取五升置磁鍋中下
餘糧四兩煮之旋添汁盡爲度藥氣香如新米矣搗之又研

萬杵方用

敬

禹餘糧

績平水土有如神禹故名出東海池澤凡山島中池澤亦有之形如鵝鴨卵裏殼重疊中有黃色細末如蒲黃無沙者佳近出茅山池澤中者極精好狀如牛黃重重甲錯其佳處乃紫色靡靡如麩嚼之無礮礮食有沙也

味甘鹹氣平寒 治欬逆寒熱煩滿主崩中下赤白血閉癥

瘕大熱療小腹痛結煩疼煉餌服之不飢 方書治氣證脹

滿欬嗽遺失癩泄瀉血痢遺精 禹餘糧水土之精氣所鍾

土劣水勢偏得水氣之專精者也氣味甘寒對待火熱及水

土濁邪聚為寒熱為欬逆為煩滿或腎形無堅固性致洪水



汎濫者

由子

傷寒下痢不止心下痞鞭利在下焦者赤石脂

禹餘糧各一斤並碎之水六升煮取一升去渣分再服

崩漏五色使人無子禹餘糧赤石脂牡蠣各煨研烏賊骨伏

龍肝桂心等分爲末每溫酒服方寸匕忌葱蒜 產後煩躁

禹餘糧一枚入地埋一半緊築炭灰一斤煨之濕土罨一宿

打破去外面石取裏面細者研水淘五七度日乾再研萬遍

用甘草湯服二錢一服立效

論 餘糧二種咸鍾水土精氣融結成形而禹餘偏得水氣

之專精者夫甘寒除熱卽草木類能奏功惟是水之精假合

於土以全地道之生化則其具足水流土止生化離合之精

氣諒非草木所得儕故能益下焦陰虛而除煩熱痛結如女子產後煩燥投之立效是一的證也 禹糧能除下焦陰中之邪赤脂能收下焦陰中之氣故相合以成鎮固之功修治 細研水淘取汁澄之勿令有沙土可也

浮石

又曰水花江海間細沙水沫凝聚日久結成有細孔如蛀窠體虛而輕白色海中者味鹹入藥更良

瀕湖

氣味鹹平 治疝氣化老痰消積塊及瘤癭結核下氣治淋

浮石色白體輕肺之象也氣味鹹寒潤下之用也故入肺

除痰熱止欬軟堅清其上源又治諸淋

瀕湖

肝屬木當浮而

反沉肺屬金當沉而反浮何也肝實而肺虛也故石入水則

沉而南海有浮水之石木入水則浮而南海有沉水之香虛

實之反如此

余

血淋沙淋小便瀉痛浮石為末每服三錢

生甘草湯調服

石淋破血浮石滿一手為末以水三升醋

一升和煮二升澄清每服一升 小腸疝氣莖縮囊腫者用

海浮石香附等分為末每服二錢薑汁調下

頭核腦痺

枕頭

後生痰核正者為腦側者為痺

白浮石燒存性為末入輕粉少許麻油調塗

弗用手按按之即漲或加焙乾黃牛糞尤好亦治頭瘡

論 敵金丸用浮石治疝氣

見準繩

蓋疝屬水臟偶結之邪亦

似有中疝而不得即散者然却非本來沉疝之疾也即此種



水氣之偶結似石而甚輕虛還不離於浮聚之氣者以對待之本氣味鹹寒以入水臟取其結之出於偶然而散之還卽以其偶然固藉氣以爲推移耳至於治老痰積塊消瘤瘦結核似亦不越前義日華子更云治淋想於沙石之淋尤宜

磁石

亦名慈石生於有鐵處鐵受太陽之氣其始一百五十年而成慈石又二百年孕而成鐵 石中有孔孔中有黃赤色其

上有細毛者功用更勝頌 一種元石與磁石相似而色較

黑不能吸鐵蓋磁石生山之陰有鐵處元石生山之陽有銅處形雖相似性則不同

味辛氣鹹微溫有小毒氣味俱厚沉而降陽中陰也入足少

陰兼入足厥陰經 主養腎氣補男子腎虛風虛強骨氣通

關節明目聰耳治周痺風濕肢節中痛洗洗酸消又身強腰

中不利加而用之止金鎗血煉水飲之亦令人有子並療小

兒驚癇 不徒養腎氣亦能填精髓腎虛耳聾目昏者倚之


宗 得金水之氣以生色黑而入腎故治腎家諸病一士子

頻病目漸覺昏腎用東垣羌活勝風湯加減與服而磁硃佐

之兩月遂如故蓋磁石入腎鎮養真精使神水不外移硃砂

入心鎮養心血使邪火不上侵而佐以神麴消化滯氣生熟

並用溫養脾胃發生之氣方見千金神麴丸 湖瀨 慈母鐵子



也慈之煖鐵互爲噓吸無情之情氣相感召所主諸證皆以

類推亦屬假借

子由

諸藥石皆有毒且不宜久服獨磁石性

稟冲和無猛悍之氣更有補腎益精之功 老人耳聾磁石

一斤搗末水淘去赤汁綿裹之猪腎一具細切以水五升煮

石取二升入腎下鹽豉作羹食之米煮粥食亦可 陽事不

起磁石五升研清酒漬二十七日每服三合日三夜一 小兒

驚癇磁石搗末煉水飲之 金瘡血出磁石末傅之止痛斷

血

論 慈石孕二百年而成鐵則其生化之氣所畢萃者金也

腎水之母氣所獨鍾而感召特異故能益腎之氣以療虛石此

本堅貞之氣爲鍊之母其益腎氣固有迥異於他味者是以
虛勞方中有磁石丸治腎痿消痺腎氣虛損者有腎瀝散以
慈石爲君卽其上通耳目之竅而益聰明固可思矣夫腎氣陰中

之陽也腎氣足是以更療風虛蓋腎乃肝之化原腎氣虛而
肝亦因之風屬陽也肝之氣虛故曰風虛張雞峯有云臂細
無力不能任重者此乃肝腎氣虛風邪客於營衛之間使氣
血不能周養故也肝主項背與臂膊腎主腰胯與脚膝此證
乃肝氣偏虛宜專補肝補腎雞峯此說不正與本經所指周
痺風濕肢節中痛不可持物洗洗酸消者相發明歟別錄消
癰腫鼠瘦頸核此皆通關節之所及而其本由於補腎虛風
虛如止補腎虛而不補風虛則亦不能通關節以療諸證矣

蓋肝以腎爲體腎又以肝爲用也總之慈石主治所以於腎
氣爲切者由其腎中母氣確有感召之精能通於氣血之中
耳如止云重可去怯不泛然而同諸石之用哉 又按獨孤
滔云慈石乃堅頑之物無融化之氣止可假其氣不可服食
是以繆氏云用之漬酒優於丸散觀慈石丸治精氣虛極乃
以酒煮碎磁良久嘗之酒有石味將石拌諸藥曬乾再拌再
曬如此數次務令石味入諸藥中和透更以此酒搜和諸藥
爲丸庶幾得之

辨治 能懸吸針虛連三四者佳火煨醋淬九次細研水飛
或煉汁飲之

代赭石

赭者紅黑之間色也出代郡一名土硃一名鐵朱代產難得
擇取石上文頭有如浮漚丁者謂之丁頭代赭色如雞冠且
有潤澤染爪甲不渝者良

味苦甘氣平寒氣薄味厚陰也降也入手少陰手足厥陰經

乾薑爲之使畏天雄附子 治鬼疰賊風腹中邪毒氣除

五臟血脈中熱鎮虛逆大人小兒驚氣入腹女子崩漏帶下

安胎 代赭陽石也 外丹本草 怯則氣浮代赭之重以鎮之傷

寒汗吐下後心下痞鞭噫氣不除者主旋覆代赭湯 好古 小

兒瀉後眼上三日不乳目黃如金氣將絕此慢驚風也宜治

肝用水飛代赭末每服五分冬瓜仁煎湯調下愈 急慢驚
風弔眼撮口搐搦不定代赭石火燒醋淬十次細研水飛日
乾每服一錢或半錢真金煎湯調下連進三服脚脛上有赤
斑此驚氣已出病當安也無斑點者不可治 墮胎下血不
止代赭末一錢生地汁半盞調服日三五次以瘥爲度 血
崩赭石火煨醋淬七次爲末白湯服二錢 諸丹熱毒赭石
青黛各二錢滑石荆芥各一錢爲末每服錢半蜜水調下仍
外傳之

論 人身肝臟之氣由陰而升陽者也升而不能合於天氣
之陽則病於風本經赭石主治首言鬼疰賊風以鬼疰乃元



氣虛怯之幻象惟於補益中佐此以鎮虛怯則肝之驚風自

平何以能之蓋赭石一名鐵朱本金氣之化

山上有赭其下有鐵

金屬

天氣而赭色化赤則從火是金火合德以暢衛而達營即木

之所以得媾於金而風平者不僅如鐵繡之以金制木也若

是則赭石固氣分之劑矣何以能效血分之功歟曰陽中之

太陽心也而生血却在此心肺合而氣盛氣盛而血生俾清

中之濁入胃至脾而肝乃得司其藏血之職安得謂清鎮氣

化不能為血化之地歟或曰小兒驚癇固知病及風木矣女

子崩帶亦專屬風木之病歟曰風臟即血臟血之不獲寧謐

者多本臟風木搖之耳此味以鎮浮而平風則血不溢是固

